

四庫全書

集部

欽定四庫全書

集部

昌谷集卷一

詳校官庶吉士臣吳烜

主事臣呂雲棟覆勘

謄錄監生臣陳遂

欽定四庫全書

集部四

昌谷集二十二卷

別集類三 宋

提要

臣等謹案昌谷集二十二卷宋曹彥約撰彥約有經幄管見已著錄是編稱昌谷集者考集中有與劉後溪書謂世為都昌村落人後遷於城下昌谷巷則其所居地名也彥約初游朱子之門其後歷仕州郡却敵平寇獨卓

有實用故宋史本傳稱其可以建立事功及
入侍講筵亦能殫心啟沃其經幄管見一書
數陳祖訓規箴時政尚歷歷可稽惟其文集
湮沒不顯宋史藝文志書錄解題諸書皆不
著錄惟焦竑國史經籍志有昌谷小集二十
卷錢溥秘閣書目亦有曹文簡公集十五冊
然亦久無傳本厲鶚宋詩紀事蒐羅繁富絕
不及其姓名則無徵久矣今惟永樂大典尚

頗載彥約詩文今核其篇目如本傳所稱為
利路轉運判官時所作病夫議為兵部侍郎
時所上薦李心傳劄子俱不載其中知己未
免於佚缺然其餘諸作世所不傳者為數尚
夥謹類次排纂釐為二十二卷其間奏議大
都通達政體可見施行所論兵事利害尤確
鑒有識不同於撫拾游談其應詔陳言二封
事乃慶元寶慶間先後所上於當日苟且玩

惕之弊反覆致意切中竅要亦可徵其鯁直
之槩惟儷詞韻語稍傷質樸然不事修飾而
自能詞達理明要非學有原本者不能也乾
隆四十六年九月恭校上

總纂官

臣紀昀
臣陸錫熊
臣孫士毅

總校官

臣陸費墀

欽定四庫全書

昌谷集卷一

宋 曹彥約 撰

五言古詩

上李郎中嘉言二首

莽莽出北門迢迢伍牙山
伍牙何崔嵬羣岑間孤巖望
之蔚然秀豈無草與管中有百尺松可憩不可攀六月
久不雨祝融奮其官行人渴欲死班荆此盤旋往來得
所託感慨為長歎况爾山上苗久蔭無棄捐

桐川出幽谷等彼江漢深修然一派橫清澈寒士心有
時對日光圭稜燦星金沙礫謾自苦安能蔽清冷我行
正寒風欲滌如煩襟念彼濯纓人千載求知音

喜雪次倅車韻呈使君

使君軼何武未去民先思平生愛我意玉立無玷疵邇
來祁寒咨已賦白雪詞陽春有脚來雲意夜四垂天公
亦小兒布置人未知美滿豐年意萬里光陸離璇題庾
亮樓柳絮習家池監州有佳思徃徃似佳期格律前緩

聲比興莫相疑平分風月餘時吟冰柱詩明年朝雪宮
同上萬壽卮

雪中同趙倉從之泛舟餞錢憲文季酒中劇談
漢事臨別文季索詩賦四十韻以寄

冬序玄以冥閉塞乃其職巧作六花飛與天為粉澤初
舞若狂然既定稍真積坐令宇宙間萬象變顏色霜肅
特加厚月皎更留迹晚節答造化有此足清白今日此
何日雙觴鳴大舶清溪照紅粧醴酒障行客莫言山水

興蕭散竟何益莫作兒女戀黯然空戚戚有詔起聞人
意遠理可即王所切經綸言路倚忠直鋤莠弄湘南鐵
甲冷河北倉廩竭江外蒙袂窘朝糴隱憂關念慮閒暇
已偏仄忽作一尺圍此事費紉繹先生持論高踐履我
所識酒酣技已癢漢事多發擿仲舒智似愚紆緩却端
的公孫巧乃拙迎合屢傾側縞衣紛陸離見覲立消釋
惟有真實在拍拍滿胃臆雄辯醉得醒溫言寒褪力誰
知百丈外罪屑散珠璧須臾昂分袂眷戀語離席蒿師

興徒御酥酪在肘腋此行朝雪宮憂樂任指摘表沴戒
表丈呈瑞佇盈尺勿棹子猷船勿穿東郭屐高卧更何
為精神見肝膈歸來情緒惡膠舟隱沙礫輾轉意悠哉
隱几不能息明年兆多黍今年滋宿麥我居官得祿我
去家可食俯仰足歡顏廣廈庇仁宅想見變調人謹議
進君德先生訓故考徵小發幽蹟七篇粗可意餘子無
為役持此力行之願以間譏慝盛哉孔孟心萬世信經
籍

水北民家牕間有題夜深短檠燈功名平生心
者戲成平仄詩二首

詩書窮年燈功名平生心辛勤鶯遷喬哀鳴猿投林蘭
膏誰為容朱紱無知音安能如蜉蝣隨時安其陰

竹外兩縣境水北一草舍蔀屋日見斗韞匱玉待價禍
福自倚伏得失忽晝夜子盍去墨守我亦入遠社

知縣次韻來復寄二首

亭亭青琅玕水霜崔嵬心雖無桃李姿知非柴荆林涼

風西南來清圓彈空音其誰齊彭殤相從山之陰
得志鳥擇木失喜鵬入舍但協孔氏性忍索少室價小
草有遠志積李欲縞夜所覲匠伯顧不復棄櫟社

知縣再次韻不作平側體復次韻二首

步出山前坂遙望徒驚心下無百尺流上無千歲林至
人有遺言三歎金玉音莫飲盜泉水莫息惡木陰
和氏得荆璞眩走數百舍謂足奉至尊過眼不售價有
時置篋寄光彩忽驚夜持歸弄兒女足以照里社

贈日者

我本無能人簡冊強纏繞饒舌苦說說外貌似了了應
酬聊復爾懶惰亦不少眨眼鼻如雷黃昏到天曉

上周益公

荒村建午月斯螽動股鳴借問暑方熾何意作秋聲自
言本寒族四海無令名振羽每自歎在野神屢驚常恐
向寒時風霜莽飄零憶昨寒谷中春風全我生贈我百
艸芳遄我趑趑征是時木未茁及此莖向榮感彼蟋蟀

歌日月道以傾促織未成章淒切難為聽願言日載陽
有鳴隨倉庚

老梅晦父改韻見貽走筆奉和

有酒且莫斟聽我歌一曲所歌無長語江梅倚修竹
炯寒露水皎皎白駒谷粲粲能賦人日日對高躅詩如
何水曹發興揚州牧味入傅巖翁調鼎國受福桃李豈
不華入景混凡木偃蹇有長松窮年相照矚

贈別徐秀

出京纔四日雨雪日一縣行徧蒯江頭夢識廬山面相
逢兄弟歡莫作兒女戀歸計動心旌春風搖柳線

贈別潘漢臣

宦薄魚上竿地左猿擇木經過還似舊笑語何時足留
君潘鬢在許我曹裝趣三年却歸來此夢如何續

偶成

道心非動靜學者何難易癡雲欲掃除迅霆無擬議无
妄而微疾勿藥斯有喜一輪秋月明云為豈思慮

七言古詩

春日奉陪韓簽虞丞解監修禊事即席中所有
鰕菜梨棗分韻得鰕字

雨餘春水壓堤沙柳未花飛蒲出芽清流激湍石佛寺
崇山峻嶺野人家大酉之山檀溪壑秦俗未解書成車
居夷驟得羣賢集惠風鼓動生精華去年可疑張進士
市人物色爭矜誇今年艤棹無所適坐看孤鷺齊落霞
長官敏者唐吏部八龍受種今渥注兩年分韻得此老

未覺景物相寵嘉世南弄筆好商榷宴客自許窮珍鮭
萬金鼎至我亦喜便欲染指魚與鰕漢司隸後最靜者
家有白璧無點瑕扣之清越聲韻響滿座失喜相歎呀
怪予窮陋一不有冠者八九乃獨整歸而謀婦得斗酒
夜韭可剪魚可叉偶欲占射酒似闕自覺輩晚無肩差
暗中曹劉不易得屈宋未死甘押衙自從修楔卜師友
一洗萬古况兩蝸但恐朝家用賢急去我便立文石花
津宮先生坐官舍意此四子窮驕奢年前共得石居士

留客嵌空到日斜

原註廣文去年共飲水竹人家坐石上至晚是日偶不赴

帥相泛巨舟東下水淺不可進盤旋三日僅至

菱黃浦率同行就此作別簡以小詩

半日鑿鑿離岸鼓萬斛龍驤發南浦
戈鋌照日牙齋明
百丈咿啞更雙艣眼前突兀勝華屋
前廳中堂後園浴
主人燕坐擁歌舞
畫捧金樽夜銀燭
吳人餘皇那可比
漢家樓船聊爾耳
有時但可濟舟師
無事只堪橫野水
太平州縣邊無譁
行所朝夕如居家
恩光草際碧弄色

心事柳梢黃茁芽我亦同時浮一葉葭葦作篙蒲作楫
坐久欠身頭觸蓬卧多輾轉衣成摺旁瞻盡鷗如飛動
絕似茅茨望梁棟春光嬌面秋月眉爭妍不到書生夢
誰知淺水難籠山順風不下留驚灘津人用盡如神力
長年三老忘朝餐嗚呼材具各有用秔稻不生種稔種
涸轍聊濡鮒魚沫大壑方觀巨鱗縱我生簡便非憚煩
坐觀燕蝠爭晨昏瞥然便轉子猷棹明朝直到章江門
陪漕使春日吳江之集戲贈元理森父

垂虹夜吸吳儂水盡鷁朝飛張翰里護客歸來玉節閒
隱隱春光動浮蟻傾蓋鱸魚故交螭可人森父佳元理
著我中間醉却醒却舊管新收幾年紀

原註初食鱸魚生
間有送生螭肉者

次韻使君湖莊歌

使君德量湖水寬和氣襲人春避寒山川自古窮絕處
鑄鐵點頑成轉丹頻作好詩醇似酒妃子鬪妍西子醜
人生行樂只花時更吸西江斟一斗

次韻蔡元簡麒湖莊之句

雞本憚犧先斷尾燕粗能巢聊葺壘漫郎無用却歸來
得熟道傍真苦李誰家買田綠當戶何人種花紅照水
君詩讀罷已忘機撲漉沙鷗隨處起

大雪感懷

翻雲覆雨紛輕薄萬瑞不如三白樂歲事相關國重輕
天意亦知人忖度前年不雨旱為崇今年不旱螟為惡
造物與人著力深一飽年來何落落宜春先生古君子
撐腸萬卷一丘壑吟哦乍擬柳飛絮感慨相輝花有萼

商量雪意馳一騎改變天容翔萬鶴翻思五十乾道年
是非一律無令昨日月逝矣幾豐耗人物眇然增索寞
吹簫寡唱氣欲竭陟屺何心淚猶閣再拜珠璣卜來歲
十襲藏之富囊索

季直經幹喜得三白次師繹韻見餉走筆奉和
三農一命如紙薄已定蓋藏猶不樂年來慳雪意如何
搏空歲事堪踰度新誇兩白已呈祥數日天工還作惡
栽培玉屑界瓊田指顧同雲藏碧落萬象改容龍戰野

滿船空載魚縱壑詩才喚起金閨人坡上傳香梅綴萼
明當改選歲又稔揚州騎得纏腰鶴家有靈光獨歸然
事感鵲原驚已昨豈無他人和者寡不有阿咸幾落寞
關心不見九華樓舊遊莫歎登雲閣與我新詩字字奇
珠玉盈懷分陸橐

原註九華樓登雲閣皆舊時梅坡先生觀雪處登雲又師繹詩意也

陪使者護客晚發京口

拖船烏驚獸駭奔追夫雷動雲作屯前日生辰使者去
賀正又出丹陽門欲上未上軍人馬似響不響縣官喏

窮冬閘閉水不行深夜火明山欲赭尚書太尉傳語來
夫船未足官湏催敵使三節能幾耳客載萬舸何為哉
甘心事仇誰作俑耻不自羞猶慙憑古來秦禍不須胡
蒙恬斥外斯高寵

次韻李晦父炎早梅

華顛淡色催人老造化無功春不早翰林風月恣推排
萬馬一空三峽倒冷暖從渠入世情孤真為我參幽抱
卑枝未覺鼎鼎催不與人間障煩惱

交代趙從之善石見和次韻奉答

詩來格律辭皆老却恨有碑拋不早只因清興與花同
千詠昔聞今健倒君家裝額要冰肌我圃耐寒誇合抱
秀色孤根各自宜玉堂茅舍俱相惱

有懷昌谷老梅再次晦父韻兼贈仲元弟

水邊籬落西湖老結伴寒標歸計早月昏香動幅巾時
鐵石廣平猶壓倒新來昌谷闢藩牆密花疎幹添環抱
等閒詩酒奉周旋何似文書頻苦惱

泛舟蕭公陂

山水遶青鑪，繡紅花開繁。
亂春欲空太白酌，酒塵世外
小舟蕩。樂農事中築堤溉田，
十里同居民。舉手稱蕭公，
蕭公有惠何時窮。十里穠蔭
無凶豐。

景仁寄和蕭公陂詩次其韻

照眼石榴裙，褶紅回頭浪。
藥隨春空春歸湓浦風塵外，
詩到淮南烟雨中。護田將綠，
一水同造化，奪巧非天公。
錦囊不盡思無窮，我欲從之
歌元豐。

方南康席上觀顛妓秀英作墨梅竹

南州佳人號秀英竊弄毛穎親儒生解衣傍若無我輩
踈梅矮竹真天成公主朝粧弄眉墨誤作鉛華汚宮額
此君劔器藏鋒鋩張顛幻出公孫娘我來忽見驚心目
張八何生魏何熟酒酣耳熱且勿喧為我慇懃寫雙幅
次韻魏君寶光黃雲觀古風

重湖鏡展心生涼五老壁立背負芒中間只作如許屋
一觀雖小意堂堂書生相業綫不絕故侯墨妙燈不滅

與山三好孰四之畢萬有孫胄次澗拋染不須偉兒郎
黃雲高舉天頡頏從龍作霖皆是物邇來一足飛商羊
次韻趙使君師夏謁白鹿遊棲賢長句

三峽移名澗響空中著一橋如飲虹旁連濺瀑龍所宮
謂佛有力真冥濛非造物意無禹功一綫偶達成巨硤
可怪一律人聵聾助桀唱和更撞舂或者誤信晨暮鐘
萬有一幸相際逢吾儒自有名教蹤壁立萬古澗底松
異端瑣細秋後蛩一物不格皆妄庸誰知健者此山中

樸實可亂田舍翁出郊小隊不妨農黃巖意與考亭通
長養此道如種種駿發爾私雨我公穠叢雖饑亦有豐
常行萬世無汙隆行健不息人中龍不妨更擊白鹿鼓
扣之大小皆春容

五言律詩

同景輔登樓約集少陵句

徐步移斑杖登臨意惘然雲霄遺暑濕樓閣倚山巔薄
劣慚真隱虛空不離禪我生無倚著自有一山川

開闢當天險分明在眼前野橋齊度馬森木亂鳴蟬稠
疊多幽事淒涼憶去年何時一樽酒恣意向江天

送十三郎赴尉漢陽二首

宦路今如此親闈望已深是誰門戶責慰我父兄心鏡
裏休頻看杯中但淺斟前賢官業處端的要追尋
此地關情久淳龐好士民向來同患難今歷幾秋春綵
捧迎新尉綈袍說舊人為言昌谷老寄語益相親

出郊偶成呈府判知縣三丈二首

奉行三尺令，問訊十分春。
雞犬柴門曉，牛羊草徑新。
遠投雙嶺寺，頻見耦耕人。
我亦江南客，為農頗識真。
去郭喧囂遠，空江氣象寬。
柳舒含絮媚，梅褪著枝酸。
物外登山好，公餘盡日歡。
歸遲應犯夜，暝色占江干。

寒露日阻風雨左里詩

久謂熱當雨，茲來歸近家。
露寒遲應節，天變勇飛沙。
甕白應浮酒，籬黃可著花。
一江三十里，直欲問仙槎。

親友馮儀之運幹挽章三首

聞道江西使賓筵隕德星失聲歸士友短氣動朝廷屢
選非無意遲行若有靈忍令清燕處我輩尚談經
有學關時用無心與物馳已稱黃髮老猶似綵衣時世
道空機穽襟期自坦夷只令風月夜猶足想清規
子也吾嘗反天乎獨異渠仕無通籍祿家有厚齋書講
說來匡鼎風騷藉子虛爭榮森竇桂訓不負菑畬

挽致政朝散王大夫章二首

風流江左後今不愧諸王弓冶儒非誤衣冠晚見償當

時獨立處千載狀元鄉天定常如此三槐有二郎
子貴人間有親難及盛年出藩先使節入從冠經筵間
政承顏日歸鄉屬纊前誰能碑有道還合傳先賢

同知樞密程公挽章二首

用盡文章力多馳剴撥聲一朝歸禁近再歲即鈞衡遇
合功名迫哀榮日月傾鹽梅空有志縮手未調羹

憶昔都城會論交戊午班故書雖絕迹晚景自貪閒契
濶形骸外參差出處間重來風作惡黯淡寶蓮山

挽蔡祭酒詩二首

舊說乘驄老新來衣繡人
眷方隆嗣聖世已厭成均景
晚遲鵷序邊秋憶虎臣
家聲傳慶厯忠惠豈前身
昔締金昆好慈恩有舊題
及今如社燕與子共朝雞
未見星常北相逢日易西
定應湖上路寒色黯招提

宿蘓坊

客久囂塵外冬深驛舍前
亂山寬處日野水暮時烟
契分新筍酒生涯舊物甌
悠然歸興動依約探梅天

致政檢法牛公挽章三首

結屋明經好經明身欲修平生倉廩實不為稻粱謀官
路門方盛容臺志已酬莫言餘八袞猶欠少遲留

瘠甚都昌境民無晚種田樂輸雖欲速乞糴最堪憐帥
閫施長技王人改舊弦本原誰任責陰德至今傳

門戶關州縣交游及弟昆每於尊俎後窺見典刑存豈
不昏姻重常踈藥石言矧聞丹旒發心緒正沄沄

夏日漫興

廣廈仍炎熱疎慵疾病中賦詩當夏日鼓棹近南風自
覺塵氛少依然樂事同夜來憑眺處明月隱牆東

龍會遇雪

出門能幾里風雪故相隨新歲自有巧舊寒猶絕癡自
天藏瓦礫與客照鬚眉中冷殊關念豐年却在茲

中和後一日吳門阻雪距春分纔三日

梅容慘不競鳥語噤無聲二月朔已告三日春當分寒
餘凌暖律雪後更同雲但恐嚴凝誤陽和欲奏勲

桂陽走筆呈以道

別後蓬丘老公孟歲又闌髮因求道白心但濟時丹瘡
鬼三秋熱河魚六月寒不圖梅影夜對榻共平安

龍游道中得家信

幸自居家樂何須遣信來聲聞先隕獲書至尚驚猜問
僕心方定開緘色漸回寄言重九日掃淨玉京臺

聞官軍收復新息

降敵知無日和戎事已休百年艱國步九世憶家讎獲

蔡馳新捷收京有定謀可無蜂蠆慮馬健更防秋

再至淮南

湓浦經從後淮壖欲到時江山春自改風雨日相隨
泥滑禽猶訴崖懸馬欲疑解鞍聊間息造物本無私

書彭仲誠詩卷後

惠養無他務廉勤以自持能寬三邑責不為一州私逮
此來歸日還如始至時士民難借寇唯有召棠思
冬至留滯舒州有懷歲旦泊舟平江門外

舒郡驚冬節吳門憶歲時天寒城閉早凍合水行遲再
拜為兄壽同聲念母慈窮年終是客至日始題詩

驚蟄後雪訪徐孟堅不過坐待甚久

忽忽弄明珠紛紛擁塞酥都忘春老大復作冷工夫甲
折遲先達芳菲約後圖興來還興盡呵手復須臾

遣將追賊何公橋

遲雨停車久偷生恐未然皇威三令後民瘼萬端前貌
虎煙塵地猩鼯雨霧天監官有老眼巢幕暫狂顛

子敬作詩已久不以見示忽出一卷共有四十
字乃相陪避暑三峽橋之作戲次其韻

乃有詩如此清新思湧泉
螢緣塵外景發露性中天
舊事驚陳迹新功喜盛年
當流歌枕處醒得困時眠

二郎之官房陵作五言唐律兩章送之

入幕曾霑祿之官始問津
邊城甘冷淡世路識艱辛
責重杯棹省公餘簡冊頻
先人清白意百世尚書紳

原註
舊所

居房乃先人種竹植
梅之地名清白軒

制閭今梁棟霜臺昔範模近書先問汝遠念早寬吾衆
論宜遷木官常合守株房陵有佳處穩穩問征涂

虞司理留同官麪飯

玉版初參後枕櫛半醉中誰知三里外有此五人同移
座淋頭雨開窻拂坐風明朝公事了假道訪虞公

上巳日舍舟豐城

路出豐城縣籃輿了夕陽何人共列坐勝事憶流觴帝
里衣冠近家山念慮長慙慙樓下水今夜到吾鄉

蕭散

風日倚餘勇扶春不自由在家曾半面隨我到他州絮
後醪醖約鶯前杜宇愁新來無吏責蕭散更何求

雪中領客湖莊

天上瓊林會人間瑞物圖山藏真面目地湧巧工夫領
客驚閭巷携家窘僕奴却思邊戍地着鐵更彎弧

連雨坐湖莊

泥濘政如許出門安所之龍公無倦日老子有閒時適

意家常酒忘懷獨自棋困來饒一睡百慮本何思

春問湖莊

問訊湖莊事經年意若何為渠魂入夢老我鬢添皤雪
霽春應好山明水漸多遣兒徵僕役除道莫蹉跎

深春挈家下湖莊

去郭不三里將家踰十年轉添身散誕況乃足踰蹊九
疊春宜老羣芳晚更妍得閒無一事倚杖看鞦韆

我生聊自樂人意適相隨郊外有行處春中無倦時雖

知攀折苦未覺燕游衰更欲添桃李初心不在茲

師繹題宮姊夫惠示湖莊佳句輒次韻

願學言詩賜降心識字雄絕塵嗟莫及雅趣喜相同
性天憐老貪閒鬼笑窮可堪香火分誤入武陵中

車馬喧人境茅茨棄道旁無心天外得有玉匱中藏
畧煩詩將勾收入醉鄉會從盤谷老野處日徜徉

湖莊雜詩

萬頃蒼茫外三年種植初路回深吠犬藻密暗遊魚舊

酒春同盞新茶雪不如稍修遺老傳忘答故人書

野水平湖濶雲山疊嶂深一溪橫驛道兩岸挾神林亂
石通人迹孤舟繫客心幾年茅葦地松檜已侵尋

故邕管安撫李思永挽章三首

發廩寧憂歲防邊不待秋古來漢循吏今說李成州勁

氣橫關隴神光射斗牛竹林天下士一第可無求

原註思永

尊人號竹林先

生科舉不利

義利明千古躬行勇不疑澗瀍窮正脉張陸是吾師仕

與儒先會官從黨論卑所施纔一障聲聞徹華夷

原註
初任

與陸校山同官次
任趙事張南軒

念昔浮湘樂論交一世豪味同江左右人忘品卑高庇
我渠渠屋關心戀戀袍延津龍化後流水但空號

和趙振文太社郵筒遠寄

天與容臺掾田園早得歸盃中寧有影海上自忘機世
路閒身好人生靜者稀更於護草處靜看老萊衣

陳氏夫人挽章

邵子
山母

受氏推元女來嬪得召南躬行其誠七禮盡所從三孝
養衣皆綵權輿色已藍霜風吟木末哀怨不能堪

送以道赴漢東兵官因呈繡使吳勝之同年兼

簡李伯行檢法許定夫軍使三首

久入功名會新携辟召書忠勤曾策勵奮迅此權輿當
路心知已長城指望渠只將真實地持守足安居
仗斧暴公子酌泉吳隱之斯人未易得於我最相知見
義為常勇求賢信不疑典刑今在此此去有餘師

李許相從久時方混武文議刑新幕府保塞舊將軍二
士俱人物三賢更主君春蘭秋菊意他日共風雲

祕閣修撰雷文卿挽章二首

殄瘁連鄉黨凋零及老成玉亡修水秀星掩壽沙明不
上論思直空餘餽饌名蓋棺隆眷在論譔見哀榮

訪我鳴琴日聞公吐屑言循良臨武政忠憤大奚冤厥
後依英蕩新來近達尊却歸桑梓路忍對建昌門

右史殿撰吳之平挽章二首

閹制恩威足邊防戍守牢政平多暇日民費絕秋毫豹
尾天光近螭頭地勢高孰令黃石水旦旦只空號
生長均江左游從集豫章官曹惟掃溉人望極軒昂
論睽違後休聲涕淚傍鳳池綸綍手揮翰發幽光

故殿撰修史李舍人挽章二首

四戒從誰得忠勤與孝廉本來簡冊膏潤到閭閻仕
久機鋒熟時來智慮添平生真售用家法有森嚴

原註
四戒

乃具
先訓

丁未慈恩盛從容最後來一從辭墨綬三徙入烏臺記
動時方好持衡去不回恩榮頻出綽晚遇有餘哀

故福建提刑鍾編修挽章二首

問俗周方國推賢漢吏師立朝天有喜仗節玉無疵得
自南軒學親承北面師更無工部句可繼八哀詩

江漢迎歸客瀟湘問故人錦衣新炫畫繡使近行春坐
對長沙酒空傷夜雨神南樓風月下霏屑易成塵

薛端明挽章三首

講學聲名早飛騰藹士林九重嗟見晚諸老願交深時
有亨嘉會天無平治心每於當用處梁父又重吟

諫諍嚴凝地論思咫尺天直弦宜問俗曲突却臨邊儒
道終期用皇威可得宣視儀雖兩地難到玉階前

客本何為者逢公幕府開兵間雖有志度外本非才流
水音何在高風首屢迴只今巖石望寧忍泰山頽

故殿撰侍郎趙公挽章三首

惠國垂芳久瀘南錫第初詩書今有此衣鉢正關渠業

大喧朝野儒酸羨里閭只言三桂盛五桂尚權輿

邊瑣求良牧京華倚重臣撫摩中有備發擿靜無塵效
著龍顏動班疑豹尾真訃聞遺憾見進秩有明綸

早歲燈窓密中年宦海遙相看嗟落寞晚復共漁樵已
矣耆英會居然一葉凋豈無朋友念人物歎公朝

後溪先生劉閣學挽章三首

早除龍光渥中更貝錦傷升沈關運數變故識忠良天
定當持國時來倚幹方至今羊叔子名繞峴山傍

任重行吾道憂心屬鉅公三朝千載遇一代數人中筆
健心猶壯名高晚更穹差肩誰許似八秩有初終
憶奉巴西燕工歌到鹿鳴西清多學士南省舊門生屬
耳靈光在驚心砥柱傾湖莊空望眼讀記若為情

總領戶部楊公挽詩

諱師復
字無悔

華顯世儒業循良今吏師未應州縣薄能簡廟堂知沃
轡歌周雅含香問漢儀經綸殊未展曛景迫崦嵫
頽尾勞民久青天轉粟艱三年流馬運一笑狎鷗閒天

遠才多阨功深報肯慳勒銘周伏柱何恨掩丘山

二昆同唱第短世不堪言生晚欣親炙謙撫過撫存里

門重擁簪秀野祇空園零落西歸橐誰能作九原

原註先兄

伯剛仲遜與公為同年兄弟仲遜調官臨安又與公同舟泝峽有西歸集唱酬甚富秀野公家園名也

故經畧華文趙郎中崇憲挽章三首

國是歸宗相儒科看嫡傳與時常落落持論極拳拳柄
用無韓范師承有澗瀍衣冠何足論父子世稱賢

出處權輕重幾微見老成我官渾漫浪公道要分明忠

定名先正奸諛魄自驚翻思元祐事千古欠哀榮
世路平平好民庸處處高入朝寧却步及物自忘勞係
望人宗主為儀國羽毛修文纔下壽天亦負英豪

挽寧宗皇帝詞二首

百六消氛霧東南立際蟠統傳三聖後枕奠百年安不
識遊畋樂深知稼穡難何人青史上敢作漢唐看

混一開羣策憂勤損萬年衣冠藏禹穴歷數襲堯天密
定詒謀議難留厭世仙烏號攀莫及有淚徹淵泉

故丞相忠定趙沂公挽章三首

對策飛龍日宗卿夙所期時來人激烈身定國危疑一
德三朝老孤忠百世師是非空貝錦銘篆有鐘彝
鹽筴寬閩甚兵權慮蜀多閩民今可矣蜀事竟如何便
好尸而祝初無玷可磨緊誰求徑捷行陸強風波
譎譎羣情便鳬鳬俗眼驚此身無利鈍於國要忠誠得
力平生學求仁死後名登門非雅素持論略公平

戲集少陵句

山晚浮雲合天寒鶴鵠呼世人共鹵莽行路日荒蕪衰
謝身何補低垂氣不蘓所過憑問訊似欲慰窮途

郭承禧同年解倅印趨朝

昔在慈恩會交新意已親相逢宦處不比後來人共
度衡陽夏平分嶽麓春
蜚緣如此少欲別倍傷神
仕路何曾樂迎親却是榮
諸公新引類難弟久專城便
恐班朝著無勞仗友生長沙
風月夜炯炯自清明

張行父大監出鎮章貢艤舟來索詩

頗覺遭迴甚由來去就輕坐曹雖冷淡出位極精明我
老猶貪祿君行已問程虎頭雖好郡朝路憶崢嶸

中秋後一夕獨卧月臺

分得秋容半添來爽氣深靜中無罣礙此處好登臨老
景當風卧平生愛月心幾回烏鵲動曉色上平林

春到湖莊

飽綠勻楊柳殷紅茁海棠將春到昌谷及早下湖莊祠
事三年樂邊心萬里長新來和氣好吉報已占祥

奉濟驛次杜老送嚴公韻

奉濟傳芳久當年折柳情來賡工部句去作錦官行詩
妙將安傲吾衰及此滌草堂修舊否得見慰平生

江村散步

已落無邊木猶誅不盡茅沙光迎遠景風力開寒稍牧
處高低路漁時遠近郊竹籬茅舍外門閉可推敲

晚晴

潏水浸秋碧餘霞占晚紅浩歌鳴鶴後柔櫓泛鷗中酒

戒情難遣詩吟老未工懷哉真面目助順企清風

聞道旁有死於賊者

義氣窮羣策妖氛慘一隅分憂吾弗職殊死爾何辜智
者連千慮天乎媿匹夫諸軍猶請戰此道不榛蕪

送真希元侍郎得祠西歸

願治方凝佇求歸竟得閒空令如我輩忍媿尚朝班望
重忠嘉上身輕去就間眇然人物慮少壯亦衰顏

紅梅

雪月共高寒求多意未闌林逋五品服宋璟九還丹老
友松筠健賢宗鼎鬲酸任渠蜂蝶鬧難作武陵看

暮春

春盡無何耳客行猶及之水光風約束山貌雨矜持物
態從前好官身到底癡只言餐秀色十口政憂饑

社日熱甚中夜得雨

蛆蟻開新盎雞豚落社鍋草衰秋水淨木脫暮山多顚
氣時應爽驕陽老更苛依然霖雨在暑酷要消磨

得雨

跼蹐民無地焦熬歲不天
雨方寬趙日數已入湯
年調餉今方爾蠲租恐未
然古來勲業盛根本諱沉
綿

舟中連雨

客裏逢連雨龍公不貸人
一蓬遮晦朔萬慮入悲辛
忽淹吾道堂堂送此春誰
歟訟風伯揮掃鑑中塵

盤谷胡季隨挽章二首

天地開南學葵軒接五峰
淳熙亡一鑑盤谷有真蹤
庭

立心傳鯉門乘玉潤龍風流遮不斷堂斧若為封
我負光華遣君從懇請來人如九鼎重席為百泉開梁
壞幘幪屋星移絳帳臺湘西明在眼欲渡不堪哀

陳伯量挽詩二首

樸茂開城府師資足楷模官卑雖晚境子仕却亨途不
酒陳驚座無金疏大夫何人碑有道老手看慈湖
我晚慚初學公才又壯年同盟覺山寺共飲玉溪泉薄
宦身常隔高懷骨易仙傷心風作惡不助過湖船

趙知宗挽詩三首

壯日民師帥中年國典刑六分名郡竹兩槩使華星綵

戲方娛侍丹旌忽篆銘空餘泉一滴萬古歎清泠

原註
葬處

有泉號
清泠泉

三桂先猷遠公來應瑞芝子能傳世業令欲徧孫枝笏

盛牀應滿瑞閨索已持掛冠猶進秩天意卜深知

原註
堂名

瑞芝

匯水誇同邑桐江事事賢骨寒誰與地言重却賤天游

宦常千里歸來共一川西門今日路忍淚入資延

原註
資延

所賜
寺額

彭師泰挽章

家世文為富居寒地不寒諸昆親受業二祖昔闡端屬
耳青雲杳驚心逝水湍後來方屹立天不誤儒冠

黃季通挽章

世務經心早鄉評好弟昆但為三徑樂無間一家言已
作賢關夢爭如藻鑑寬霜嚴中夏發桑柘老南園

讀乞歸不允詔

有赫絲綸寵空貽老病羞命從今日下事比去年愁已
向祠官去猶為講席留誰知蝴蝶夢栩栩到吾州

課園丁洗竹

種竹年華晚新添數百竿低垂非我好冗長要人刪直
節心期露踈行眼界寬從茲風月夜清白足相安

邵武趙使君挽章二首

近代金枝裏何人桂籍傳祖孫三世盛文武兩科全日

月開宏業山川哭盛年天高無可問有德在民編
脫白同辛丑蒼黃共丙寅京華誇俊逸鄂渚話酸辛謂
上樵川最還登要路津鄰牆摧一柱歲晚倍傷神

道中遣興

游宦何曾樂佳時又出門春深花處處社近鼓村村天
地一羈旅江山千吐吞平生黃嬭誤今日麴生尊

潘景泰知縣挽章

甚矣吾衰久猶能誅故人愛賢高贊畫造士憶同寅道

喪慳人物才難泣
搢紳頗聞蘭玉秀
天不誤儒身

岳德器遠來見訪袖出六年前所賦湖莊詩次

韻答之

巴蜀歸才子江湖枉使車
久吟工部句新寄子公書
面對花應笑眉開柳為舒
苦無杯酒暇人事正紛如



--	--	--	--	--	--	--	--	--

欽定四庫全書

集部

昌谷集卷二

三

詳校官庶吉士臣吳烜

主事臣呂雲棟覆勘

謄錄監生臣曾照

謄錄貢生臣黃琮

欽定四庫全書

昌谷集卷二

宋 曹彥約 撰

七言律詩

羣山閣

萬里雲萍一酉陽
便將和氣壓荒涼
挽回梅萼依明燭
管領椒花入壽觴
笑裏不知熊軾重
醉餘猶記博山香

只因臘雪成佳集
等到春來味更長

原註四更後
即立春也

雨後早行

鼓鉦攢點擔先行未報平安睡已驚燈火避明天弄曉
鳥鳥無樂雨慳晴喚來野渡水新漲飽得晨炊煙自橫
驛使嶺頭無一信筍輿咿軋強貪程

和西園胡季履見寄

衣冠葉葉著師儒創見皇家異代無前事盛哉中國呂
近時繼者武夷胡累朝經學堪貽厥三世名家列友于
莫道新來凋一萼西園老栢更清癯

百年幾見弦三歎萬事相違臂一交道合不知身隱見

詩來如見手推敲我儀圖此藏周廟人實云何滯楚包
無奈廬山歸夢急遣書空報白雲巢

飲良父弟橫舟

簿書日月費消磨華鄂歸來樂事多已涉一川舟自在
相安衆口麴平和人生正好乘流止塵世相逢對酒歌
欲泛五湖真浪語浮家猶足鎮風波

連雨中買歸舟

泛菊囊萸事已休光陰無脚駛如流更無出入消磨雨

只有悲涼斷送秋戴屋未停持繖手買舟先辦打篷頭
懸知明鏡重飛處昵昵燈前問鄂州

迎寺丞舅歸舟

桂林使者赤松人爭得匡廬自在身蟬蛻一官驚俗子
鸛鳴雙舫壓江神人生到此方為樂世路新來可具陳
開盡朱門無鎖鑰滿城桃李萬家春

送雷赴漕召

原闕名

詔書隱隱下穹窿已覺朝廷後此翁儒雅久稱唐吏部

典刑今對漢中公薰風使者驅馳外暇日斯民長養中
麥隴秧田政如許定應歸報不言功

幾年分閫作遨頭又擁皇華歲兩周豈有休聲勤注倚
尚持英蕩但咨諏只今衮職須誰補自古官身可自由

相業青徐寧有定好將功業張吾州

原註後山云世稱青州王相濮州李

相而吾州自開國以來才有劉李二公執政爾贈
鄭戶部詩云聖朝未有徐州相剽作功名跨數公

我生雖晚亦匡廬得見先生喜有餘止為包荒安邸舍
敢將入幕論鄉閭一官貪祿無他望四海安身即定居

幽谷若因明主問莫言臣邑有相如

送蕭季然倅均州

持家遠與立朝同善繼何人似迺翁國史但書蕭傅直
鄉評更仰伯夷風只今邊備艱難際自古官箴謹飭中
四表親朋今健者尚看褒詔詫江東

送綿竹王主簿

渴想才名不計年得詩甜處徹中邊知君眼裏藏青白
託意盃中別聖賢萬里偶逢多幸耳一朝相別兩茫然

榮歸蜀道川涂穩莫漫噉吁信謫仙

送趙主簿

新詩燕婉似花繁好在鵷行接羽翰一笑相逢江海客
三年猶老簿書官見聞我闕猶干祿矍鑠君能欲據鞍
却似岑參寮友會陽春一曲和皆難

送易彥章以太學正召

涵養書生二百春為渠文物有經綸只今領袖賢關地
疇昔錙銖舍法人吾道年來多落落士風從此却彬彬

不應小折陳蕃角謾謂朝家棄直臣

為謝府題製錦堂

錦江新製奪春妍物采名堂意曉然應有五紋供帝袞
曾無一縷費民編年來撫字誰高手古道循良此比肩
經緯一同餘事耳清朝畫繡說家傳

漫成寄朱伯海主簿

幸拜恩綸強自寬窮居寒士忝微官風霜追遞踰千里
晨夕間關歷萬端一片山城常寂寞幾宵燈火憶團圓

當年別後傷心處極目君家草木寒

陪總卿路鈐相麥觀花修出郊故事

二月春光最惱人不禁春惱更尋春闌心秀入青青隴
適意紅臨灩灩津開闔雨晴天氣巧鋪張桃李世情均
病夫已作廬山夢尚擁籃輿託後塵

秋日出郊

早是清和便束裝只今庭葉報新涼山應險盡饒寬大
水欲平來尚激昂已服官常猶潦草未紓民力要商量

鮮于司馬經行處文物彬彬意緒長

送湖口尉王德高解印東歸

笑解龜符指鄭鄉應從鳳口得書忙平生壁水功名志
壯歲鍾山姓字香惡少何人窺甕牖長官無事燕琴堂
從今我亦南州吏乞取梅仙已驗方

程宰虞薄和縣庠老桂詩見貽再賦以謝

風流人物冠瀛寰折桂曾驚咫尺顏肯賦標梅深有味已
標仙籍正相關一枝笑入絃歌裏千古名傳俎豆間

欲攬枯腸追妙語飛來雙鶴杳難攀

龍游道中即事

幾年舟楫便吾曹步入龍游記所遭
激水代春城旦作
又松親爨店人勞
屏除車馬肩輿冗
料理泥沙甃甃高
忙裏著晴天意好
坐令行客興滔滔

送臘

謂向年前稍自寬
惱人時序故多端
幾回水落還添浦
百樣天晴却轉寒
未有梅開供探討
若無酒遣太衰殘

明朝便是春來處暖律丁寧著眼看

家本譙人得奉祠亳州喜賦述懷

宦游隨喜亦云聊筆橐何官晚見招已定秦關無論蜀
好恢湯毫却歸譙雪邊廬嶽雲千嶺雨後湖莊水一腰
買得扁舟能著我便無西子也逍遙

送錢文季國博赴召

每向招賢看典刑中間人物似零丁只因朋黨排諸老
無復紛綸任五經一節何如歸帝所賜環元不為郎星

古來官職論車斗只有忠嘉可篆銘

衝暑相迎慰寂寥忍寒為別助蕭條
笑談但喜頻揮麈夢想何嘗到續貂
已辦犁鋤供老圃尚乘輶傳託公朝
班聯若問官聯舊說與思歸不自聊

春到湖莊

堤南堤北水溶溶旁倚羣山不礙風
收拾田園供老境栽培桃李課新功
塙頭向長千章聳潤下潛流一線通
脚力尚堪行樂在年來天不負衰翁

湖莊述懷

昌谷喧聲漸屏除湖莊新意亦空疎
遠栽夏木來鳴鳥短截寒飢縱小魚
架有空籤聊貯藥樓無他用只儲書
病來得情因成趣此外於人百不如

門無賓客愧朋儕冷淡何人諒此懷
隨意作詩無唱和等閒沽酒不安排
每扶短杖行方穩欲泛扁舟計未諧
訪得廬山與彭蠡不論晴日雜陰霾

湖莊春晚

栽種成陰恰十年水光山色靜無邊
杏桃賞徧春容老松竹添多晚力堅
向有味中求冷淡好寬懷處且盤旋
干戈漸說邊塵息朽木因依得晝眠

使君領客訪湖莊分簡齋茂林當日映羣賢之
句得羣字

風流人物總能文洗我榛蕪久離羣
意氣掃除投老障浩歌驚起住山雲
風迎小隊春三月天與湖莊景十分
七子賦詩皆寵武剗腸猶不報慙慙

九日領諸子同季明泛舟之湖莊

為酬佳節訪江皋短棹能寬脚力勞把菊未遑憂歲惡
愛松相與歎風颺雨餘得水三湖闊天靜無塵九疊高

老病不將詩領會新來能賦屬兒曹

原註是歲無大水旱而五穀僅半收

數日大風拔木湖莊古松悉為烏有

十月一日陪使君領客之湖莊

鶴鳴雙鷺壓中流斷送餘分不盡秋石罅有聲轟壯語
風驕無計尼真游江神自合供如願艇子尤能送莫愁

却笑湖莊真落莫，但留斜日照歸騶。

原註是日北風稍勁，已舍舟於雲棧。

石下使君徇歌者之意，復挈舟至郡亭。

送權次翁赴湖北計幕

萬竈貔貅趣上邊，皇華新遣墨猶鮮。
何人共了飛貂事，有客同稱入幕賢。
舉酒便驚分袂處，掛帆直到賞音前。
不妨勲業高前哲，却與山寮作後編。

送章致遠賢良赴招撫司機幕

窮經知國更知兵，梁楚中間播此聲。
唐幕亟招溫處士，

漢廷徐策董先生平時未識人賢否用處方關國重輕
露布便多機事少寄書因到武昌城

答傅憲

妙語差肩落燕泥亨塗驤首化龍堤敢酬閣老慚非杜
適見夷吾不為齊趣覲可無三節召送行那有一錢齎
功名自是平生志旃罽為庭正可犁

次耿令君藥名韻

賦分微官即忍冬衣單無計可防風四方遠志從頭去

一水空青到底窮地骨自寒誰與祛天門欲到愧無功
是誰直上凌羊角却更從容使脫空

再次韻熟藥名

善保生經莫怨冬心存和氣自消風誰能聚寶徒誇富
粗有千金不訴窮未許二仙為聖散且將一字見神功
何時相對清涼飲越舞齊謳酒不空

雨雪中歲享卧病不能陪位令諸子代拜

歲事無多世事忙病夫終日卧藤牀雪積易消春已近

雨來無節畫偏長
朝儀尚想三迴舞
歲享難持一瓣香
莫道葢棺便無事
義方猶欲訓諸郎

首春課湖莊種植

買橘求杉荅履端
尚虞霜雪重遮闌
桃蹊上下全鋤麥
梅嶺中邊雜藝蘭
鉅竹栽成千百箇
野花留取兩三般
生平只有田園樂
晝短還須秉燭看

師繹再賦湖莊雨後佳句有惜春之意復次其

韻

委曲東風滿萬家家培桃李恣雄誇先生客裏觀時態
老子詩中感物華雨後有花須領畧春歸無策可攔遮
山行忘却芳菲趣把玩珠璣到日斜

子山見和去年湖莊春晚詩仍次前韻

筆硯論交半百年中間搖落更臨邊尋盟花木春猶在
結友松筠晚益堅雪霽萬峯開紫翠江空一水恣回旋
何時共我湖莊樂醒後吟詩醉後眠

明之亦和詩來復次前韻

當年莫逆尚忘年今日霜蓬入鬢邊已軟花盟猶習情
驟迎詩敵敢攻堅依樓有幸烏南繞會合難并蟻左旋
著我畫圖添李邵丹青那復起龍眠

師繹諾湖莊之約畏風色不果來以詩見餉次

其韻

宴集慚非左氏莊妄行村落似猖狂人生適意真難遇
天意慳晴未易量可但客衣吹杲杲只愁春色去堂堂
輟行句好猶追逐驚蹇奔波怯乘黃

送魏使君歸宛陵二首

姓名久已御屏間
合上鋒車入帝關
豈有薦書喧筆索
但留聲價惠江山
簿書袖手詩還在
出處忘情意自閒
不分愛江樓下水
隔人無計可追攀

我無郡績合歸與
君有時名孰舍諸
其事頗同人頗異
此心相照亦相踈
一時風力天容改
後夜月華雲氣舒
同是江南易回首
人來多寄一行書

次韻葛丞至節見邀踏雪

照人好語妙陽臺佳節相隨七日來甚欲去陪桃竹杖
可憐消盡豆稽灰喜君天上星辰次贈我人間錦繡堆
小試平章和氣動他年台鼎要鹽梅

和兖子冰詩

畏折綿霜已不勝加工寒裏立威棱爭明日月天無色
過住江湖曉作層欲倚為山憂覿見不如吟柱得詩能
規恢可但滹沱事只任賢能也中興

鹿鳴小集奉餞赴省諸公

便從場屋了經綸
看取朝家詔選掄
天賦忠良須努力
人生溫飽豈榮身
鼎來時事方憂國
到底儒冠不誤人
青紫拾來餘事耳
直應尊主庇斯民

昌化朱浪潘子雲漢臣季子也漢臣既物故持
其季父聖與詩來因問堪村徐季登其健如昔
昔戊戌省試後道出昌化館于漢臣一日同訪
季登遇榜下第于渡口今三紀矣因子雲告別
有感前事作此章以餞之為我謝聖與兼簡季

登

朱浪山春啼杜鵑溪南溪北刺舡船人生幾度年三十
世路重逢事百千客已倦游今老矣君須揖別故淒然
從容有問居閒意為說湖莊水一川

送陳彥功入都

握手論心九歷年中間多難不堪傳相親幕府分襟後
說到銅官製錦前訪我田園猶命駕愛賢時節好加鞭
別懷莫問書疎數老病無端日晝眠

方孚若惠端溪硯

不宜磨墨謾論車風字偏坳玉斗斜喜有山靈藏舊物
幻成蟾影照圓沙活鸚眼好童謠誤死馬肝真帝語賒
辜負海深天濶樣玉堂何似竹籬家

題漢李固太尉廟

生死忠邪未易窮其如國脉是非中誰知刺骨翻為福
不念捐軀有此忠一日太阿歸跋扈百年黃鉞授姦雄
不然彼亦何為者敢肇兵端起鄴宮

同兒輩食雪和充子韻

天然高潔淡為真似蜜增甜亦可人不分
瑤花驚俗眼更招瓊液到吾唇
取來酒後團圞夜壓盡人間瘴癘春
遙想嚼瓊清到骨古來持節要忠臣

子敬見和食雪詩仍次前韻

色如姑射未全真消得新詩膾炙人
永不待藏須潔齒凍何須解要濡唇
烹茶尚有齏鹽味食藥難誇麴米春
賸欲清涼非內熱不應宴賞羨諸臣

病中有感欲落不落雪舊事偶成唐律

東皇雅欲破玄冥滕六終懷可否情豈不願豐招瑞氣
又虞加力困饑氓柳雖閣絮心猶壯梅不能粧意自傾
只恐玉龍禁不得便輸鱗甲賦羣英

驚蟄後雪作未已阻之湖莊

甲拆多應滿藥欄跨騾心已拂輕鞍正疑陰固仍飛雪
豈有春中却冱寒啓蟄候蟲猶自閉向陽梅子自能酸
誤成嚴冷非天意說與人心作好看

登復州城詩

李子園邊水滿洲當年桑土欠綢繆城分南北平腰束
湖號東西拍面浮馬健獨能全上幕水清元不污賢侯
滿城山色春何在小立無言萬象秋

見梅有感

莫把夭妍等重輕賦成千韻況難名看來好處非因色
敢向春前似有情奈老不成三弄笛濟時還擬一杯羹
清標實用何人可只合差肩宋廣平

次仁季詠梅韻

誤分符竹建星臺官事縈心不到梅粉而莫驚公主艷
鐵心曾對廣平開託身冰雪剛而栗取友松筠晚不回
已向箇中懷鼎味直須魁占百花來

再次仁季詠梅韻

衙官桃李列芳臺豈有凡花敢並梅雅健巧妨羣動息
參差能作數番開爭先照眼春無限索笑關心日幾回
莫道暗香非是雪許多蜂蝶不知來

水邊得月共樓臺此處風光可認梅萬態爭如踈影好
一尊何惜笑顏開東君為爾饒先著俗子逢之倒射回
莫恨隴寒無驛使江南衝暖望歸來

仁季再賦亦再賦二首

昔年遠訪鬱孤臺止渴曾詢庾嶺梅別後只從忙裏過
到今多見旅中開是非汨沒身添老寒暑侵陵首屢回
却憶故園松竹外朔風吹雪亞枝來

何物清高稱月臺雪天佳客照江梅謝家玉樹庭前發

后土瓊花歲裏開朝日何郎吟未徹晚風姑射宴方回
橫拋珠玉人間世只恐花神駕鶴來

章泉言語妙天下知僕無詩能且未識面乃時
以佳篇見餉何也不敢再虛盛意勉次韻二篇
以謝

珍重章泉辱寄書應疑不復夢匡廬本無學術安時論
誤入班行拱帝居老矣應招寧為祿時乎歸釣亦非漁
宦情山色常如此欲去遲行媿二疏

吟罷新詩却看書先生必自愛吾廬天開上壽供椽筆
地出佳泉相廣居自古莘耕懷道義只今舜德起陶漁
直須大老歸來好莫道高情與世疏

況子沿檄來歸舟過淮右繡衣左國錄贈行以
詩因及衰朽次韻奉酬三首

況也來從班馬傍泛舟千里尚醲香庭雖過鯉元無異
桴偶乘由得問強親見治民如治眼歸談勤事更勤王
翻思父子寒如此孤負珠璣富墨莊

金石為心錦作腸案前合侍玉皇香只因淮蔡須裴度
不為并州戲葛強繡斧邇來新遣使瑤琛從此盡輸王
功成遠勒燕然石閒却江西左氏莊

憶昨相逢是豫章笑談親接齒牙香如今但有心期在
不似當初脚力强投老頗能安晚境祝釐聊以報明王
簡編未了平生債冷淡猶能讀老莊

使君見示鹿鳴詩走筆奉和

眼明及見決科文發策當書第一勲八句催行歌白雪

一言合意定青雲君今去亦朝天上主聖還須對夜分
遙想朱華傳勅處九重春色醉朝曛

四明趙添監連日惠詩不能盡繼匠手次唐律

韻以謝

馬口為銜不自寧轍環唯筆可深耕門迎滄海襟期闊
地通天潢句法清吾道本無青白眼世情休歎短長繁
珠璣肯袖來昌谷不道陳人畏後生

陳倅寄惠四詩用昌黎和裴相韻愧不能當也

走筆賦二章以謝

兩歲驅馳馬首東，曾微一戰可論功。
因人偶爾成擒蔡，無計降之媿伐崇。
萬竈炊煙歸塞下，十分農事到湟中。
酸寒伎倆纔如此，辜負新詩託至公。

近來人物眇江東，況也書生責勇功。
痛定卻思三策謬，歸來猶想萬山崇。
誰從荀伯官寮裏，賦入昌黎句法中。
戎事尚多心事少，苦無佳語可酬公。

偶成

春入園林種種奇
化工施巧太精微
山禽說我曾中事
煙柳藏他物外機
既遣杏桃空際發
又令蜂蝶近前飛
如何有眼無人見
只解西郊看落暉

脚踏和風步步春
石魚樓上等閒人
興來衝口都成句
老去遊山不動塵
李白誰知他意思
桃紅漏洩我精神
忽逢借問難酬對
只恐流鶯說得真

攝守漢陽次韻項平父餞行之句

我計短於頭觸蓬
公才高似目飛鴻
已馳騅馬雄西楚

尚引蜉蝣綴國風
願伯明年終惠我
以曹為解可無公
欲持枉尺歸繩墨
祇恐旁觀血指紅

用四明劉聘君古風四韻賦唐律

錯落珠璣滿袖傾
百年初見媿生平
人從伊傅平頭數
句似陰何徹骨清
惠我善隣天有意
惜君橫道世無情
曲終狗尾那能續
欲附曹劉萬古名

章泉趙昌父頻數寄詩再次韻一首

斗南獨立章泉老
四海神交可得親
適意不忘新進

客作詩時託遠來人報無瓊玖衰緣病保此珠璣富不貧
命駕已孤千里志掛冠今欲致為臣

譚仁季以二詩見貽走筆次韻

風聲久想杜陵珂坐對忘年可爛柯但覺清談揮玉柄
也知文律敵金科螳螂欲振難當轍鼯鼠終微漫飲河
從此吳堂風月好滿腔茅塞半消磨

詩才清不羨滄浪曾向歐曾接瓣香萬里相逢書遜志
百年幾見易含章君溫有脚開春盎我暗無心得夜光

可奈文場催戰急陣雲飛動正堂堂

次韻清卿用使君鹿鳴韻見貽

甲戌家聲僅有傳等閒膏澤下雲天苦無事業榮宗黨
強把忠勤了歲年往事紛紜幾折角後來奔軼要加鞭
得時自古無淹速却與亨塗作壽仙

送友人

藥裏包回碾白聲得閒消息病先輕謂予不信看舟楫
之死無他況利名積雨晴邊花蒂耐好風吹外葉聲平

只愁岸送檣留後却憶湘南老友生

冬至伊邇滯留桂陽有感

如此生涯任轉蓬幾年漂泊羨歸鴻
淒涼落日荒山外黯澹愁雲暮靄中
叢菊乍殘秋色遠嶺梅將放雪光融
枯腸索盡渾無事詩句粗成付碧筒

憶歸口號

壯年梁父粗成吟亦謂逢時可盡心
過了許多空日月得來輕棄舊山林
平生簡冊心猶壯晚歲規模力不任

何事一來何事去去來端的要知音

初無警策驟驚人亦不媿姁巧進身每向經筵持正論
願於國脉獎忠臣昔從新政趨嚴召今為衰年避要津
陛下果能行古道雖閒猶是太平民

漫說湖莊水與山不因松菊便求閒月中休沐纔三日
殿外經從僅百間但有心期思報主苦無脚力强趨班
得歸便欲踈賓客本意劉伶不閉關

春至

閨後陽和樂不禁還將動靜印天心借留臘意梅藏玉
指點春容柳轉金冗奪漸疏詩領畧情鍾須索酒追尋
玉京山色却亭水自與絲桐作賞音

謝朱鶴舉招飲

里巷浮沉適自由江城久住似菟裘廣文活計貧無那
好客情懷挽不留滿院竹風吹酒面兩株榴火發詩愁
料應此外無佳致人物相看總上游

旬休日遣懷招陳德溫飲

擁鼻南窗對晚陰自憐終日坐蕭森
相如未遂題橋志工部虛勞戀闕心
儘辦赤心遭白眼聊將綵服照青衿
東隣况有陳驚座時得花前一盞簪

謝羅醴陵宏材樂府見寄

自別湘中首屢迴漏傳春信一枝梅
固知我老何須此不與時同亦壯哉
百里去思民父母三年歸作國臺萊
更將餘力哦新調三百篇中著意來

雲隱李季可挽詩二首

雲卷雲舒好靜觀，謂宜隱者似無端。
誰知天上為霖用，竟作人間出岫看。
萬里功名當進步，諸昆時節合彈冠。
只因自得無心趣，三度歸來現宰官。

當年棋酒漫追攀，幕府承平白晝閒。
帥事却來兵革後，官身唯冗簿書間。
壯懷日者論交舊，末路天乎與壽慳。
風急浪高雲黯淡，計書新到落星灣。

魏總幹嘉父以果齋求詩為賦二章

請言山下出泉蒙，蒙養從來有聖功。
三德知仁非好勇。

六爻險止要時中申棖有愆剛安在曾子無仁毅不洪
以果名齋兼衆德力行方見古人風

偶向齋名見一斑其中蓄德尚多端講明自有安心要
出處還須中節看持以贈君成我拙歸而求此有兄難
當年射策封章意暴虎如由膽亦寒

遣吏約同官奕棋議事知有蘇山之游不果來
晚使君載酒見過遂賦此詩

索居誰復共前籌坐想蘇山最上頭並轡水兼天共遠

孤吟棋與酒皆愁，孰令客裏擠排老。
不分軍前斷送秋，却有鄰翁驚笑語。
夜來尊俎對賢侯。

使君黃秘書，上印有期聞嚴召。
已得好語賦唐律，送之。

五十萊衣宦海榮，每將忠謹報平生。
暫分竹去寬宵旰，又賜環歸近聖明。
人物渺然須引類，東南竭矣願休兵。
功名自重囊中物，感悟從來看積誠。

上湖廣總領趙郎中

總角爲兒百未更已陪先進識英名
慣聞似覺雄風近
因問從知看日明
千里未迎天子詔
一同先說長官清
吏師況有桐川舊
敢向題輿問去程

春風湓浦駐行軒
獨許愚儒夜叩關
六路方迎新遣使
五年猶念舊登門
薄緣未許南樓分
歸夢唯驚丙夜寃
幸自秋江好天色
一帆風月際真源

豈無山水憚登臨
未話平生語欲清
得馬經營今搏手
傷弓憂患幾驚心
所思未覺荆山遠
欲往寧辭沔水深

山水有情絃未絕請從千里抱鳴琴

次韻趙俞宣德石博山香臺

水骨苔痕洞穴開龍騰波湧碧崔嵬煙雲靜向林中起
風雨飛從海上來江外廬峯傾瀑布日邊鼇頂對蓬萊
幾經兵火今猶在拂拭還看貯劫灰